




Mimi naitwa Sesi, nina umri wa miaka sita. Ninasoma darasa la kwanza katika shule ya msingi ya Manyinga.



Siku yangu ya kwanza shuleni, ilikuwa nzuri sana. Niliamka asubuhi sana, baba alinipeleka shuleni. Njiani niliwaona wanafunzi wenzangu wakiwa na wazazi wao.



Mara nikasikia kengele inalia  
ngo! Ngo! Ngo! Wanafunzi  
wengine walikimbia mbio.



Nilipowaangalia, lo! Nilijiona niko mdogo peke yangu. Wengine wote ni wakubwa, warefu.

Kila mmoja alisimama katika nafasi yake kwa mstari. Nami nilikimbia mbio kuwafuata, nilisimama nao.



Dada mmoja mkubwa alikuja, akanishika mkono. Alinipeleka kwa wanafunzi wenzangu.



Niliposimama nikasikia sauti nyuma yangu “mama huyu amejikojolea.” Wote tukageuka nyuma, Nilimwona mwanafunzi mdogo. Ameshikilia kaptura yake.



Miguu yake yote imelowa.  
Machozi yanamtoka. Kaka  
mkubwa akaja, akamchukua.  
Sijui alienda nae wapi.



Mwalimu alitonesha darasa letu lilikuwa kubwa na safi. Aliingia mwanafunzi mwingine amechelewa. Ameshika viatu mkononi.





Mwalimu alimuuliza, kwa nini amevua viatu. Alisema mama yake humwambia kuvua viatu, anapoingia ndani ya nyumba, wote tukacheka.



Kengele ikalia tena ngo!  
Ngo! Ngo! Tukakimbia,  
tukasimama kwenye mstari.  
Lakin hatukuwaona  
mwanafunzi wengine ila sisi  
tu. Mwalimu akaja  
akatuambia, sasa ni  
mapumziko hatusimami  
kwenye mistari.



Baada ya muda kengele iligonga tena. Kila mwanafunzi alikimbia mbiombio. Sikujua niende wapi, kwani nimesahau darasa langu.



Nikaliona darasa mbele  
yangu niliingia. Wenzangu  
wawili wakanifuata.



Tulipotaka kukaa tu, walikuja akina dada watatu. Mmoja alituuliza, tunatoka wapi? Mmoja wetu akaanza kulia. Dada mkubwa alimuuliza kwa nini analia. Akasema anataka kwenda kwa mama yake. Wanafunzi wengine wakacheka.



Mwanafunzi mkubwa alitupeleka darasani kwetu. Mwalimu aliingia tena darasani. Alituambia kengele itakapogongwa tusitoke nje. Tuwangoje wazazi wetu watufuate.




Kengele ikalia tena ngo, ngo,  
ngo! Wengine walisimama  
walitaka kwenda nje. Wote  
tulifurahi, tulipowaona  
wazazi wetu wakitungojea.



Baba na mama waliniambia, nisikilize vizuri maelekezo ya walimu. Baada ya kumaliza chakula cha usiku. Baba na mama waliniuliza habari za shuleni. Niliwasimulia kuwa tulipotea darasa, walicheka sana.





Usiku niliona hauishi.  
Nilitamani kuona siku yangu  
ya pili shuleni.





